

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : BUKAN JAWAB LISAN

**DARIPADA : PUAN NURUL IZZAH BINTI ANWAR
[PERMATANG PAUH]**

SOALAN

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan:-

- (a) pendekatan baharu untuk menangani isu pencemaran disebabkan pengimportan sisa plastik haram yang membimbangkan; dan
- (b) bagaimana Kementerian menangani isu kemasukan sisa plastik secara haram dengan efektif memandangkan ia daripada sisa yang tercemar, tidak homogen dan tidak boleh dikitar semula.

JAWAPAN

Tuan Yang di-Pertua,

Untuk makluman Ahli Yang Berhormat,

- (a) Bagi menangani isu pencemaran yang disebabkan pengimportan sisa plastik haram, satu garis panduan berkenaan kualiti dan jenis sisa plastik yang dibenarkan untuk diimport dan dikitar semula di premis-premis yang tertakluk di bawah Akta Kualiti Alam Sekeliling, 1974 sedang disediakan oleh Jabatan Pengurusan Sisa Pepejal Negara (JPSPN) sebagai rujukan dan panduan kepada pengimport sisa plastik bagi memastikan supaya hanya mereka

yang memenuhi kriteria pengimportan sisa plastik yang ditetapkan sahaja akan diberikan '*Approved Permit*' (AP) untuk mengimport sisa plastik. Selain itu, kilang kitar semula sisa plastik yang berkaitan juga hendaklah mematuhi sepenuhnya standard seperti yang ditetapkan di bawah Akta Kualiti Alam Sekeliling, 1974. JAS juga telah menetapkan polisi-polisi berikut bagi pematuhan kilang kitar semula sisa plastik di Malaysia:

- i) **Kilang baharu** kitar semula sisa plastik adalah tertakluk di bawah Aktiviti 14(b)(ii), Perintah Kualiti Alam Sekeliling (Aktiviti Yang Ditetapkan) (Penilaian Kesan Kepada Alam Sekeliling) 2015 yang dikehendaki menyediakan Laporan Penilaian Alam Sekeliling (EIA);
- ii) **Premis sedia ada** wajib memastikan semua komponen sistem kawalan pencemaran alam sekitar seperti Alat Kawalan Pencemaran Udara (AKPU) dan Sistem Pengolahan Effluen Perindustrian (IETS) beroperasi dengan baik dan diselenggara;
- iii) Premis hendaklah terletak di dalam kawasan perindustrian;
- iv) Sistem Kawalan Pencemaran Alam Sekitar ini perlu mematuhi standard seperti yang ditetapkan dalam Akta Kualiti Alam Sekeliling, 1974;
- v) Premis hendaklah mempunyai Orang Yang Berwibawa (Competent Person) bagi pemantauan dan pengendalian Alat Kawalan Pencemaran; dan
- vi) Premis hendaklah sentiasa mengamalkan '*good housekeeping*'.

Bagi pelan jangka panjang, strategi JAS adalah seperti berikut:

- i) Kawalan dari segi penempatan, dimana hanya kilang yang terletak dalam kawasan industri sahaja akan disokong oleh

JAS untuk mendapatkan lesen operasi dari Pihak Berkuasa Tempatan;

- ii) Memastikan pematuhan berterusan kilang dengan mempertingkatkan penguatkuasaan termasuk penguatkuasaan yang dijalankan secara bersepadu dengan agensi-agensi kerajaan yang berkaitan;
 - iii) Kawalan terhadap kualiti sisa plastik yang akan diproses dan kilang hanya dibenarkan beroperasi berdasarkan kapasiti/had sebenar sisa plastik yang dikendalikan; dan
 - iv) Kilang perlu menggunakan kelengkapan kawalan pencemaran/teknologi yang lebih cekap untuk memastikan pematuhan secara berterusan.
- (b) Sehingga kini, 220 kontena plastik telah ditahan dan diarahkan untuk dihantar balik ke negara asal oleh pihak JAS. Daripada itu, sejumlah 23 kontena telah disahkan tiba balik di negara asal manakala 74 kontena dalam proses penghantaran pulang serta 103 kontena yang kini sedang dibincangkan proses penghantaran pulang ke negara asal antara pihak JAS dengan *competent authority* dan *shipping liner*.
- (c) Jabatan Alam Sekitar melalui Kementerian Tenaga, Sains, Teknologi, Alam Sekitar Dan Perubahan Iklim sedang menyediakan '*guidance document*' untuk rujukan kepada stakeholders yang berkaitan seperti pengeksport, pengimport, '*shipping liner*', '*forwarding agent*' dan juga agensi-agensi penguatkuasa mengenai kriteria dan maklumat yang perlu dipatuhi dan disediakan sebelum pergerakan merentasi sempadan sisa plastik dibenarkan.

Selain itu, selaras dengan keputusan *Meetings of the Conference of Parties (CoPs) to the Basel, Rotterdam and Stockholm Conventions* pada 29 April – 11 Mei 2019 di Geneva, Switzerland, maka sisa plastik akan disenaraikan di bawah *Annex II* di bawah

NO. SOALAN : 437

Konvensyen Basel dan akan mula berkuatkuasa pada 1 January 2021. Ini akan membolehkan sebarang pergerakan merentasi sempadan sisa plastik dikawal melalui prosedur yang ditetapkan iaitu '*Prior Inform Consent*' di bawah Konvensyen Basel. Prosedur ini akan membolehkan Malaysia mengawal kualiti dan pematuhan premis yang akan mengimport sisa plastik berkenaan. Prosedur ini juga membolehkan '*competent authority*' negara pengeksporn mendapatkan kebenaran terlebih dahulu daripada '*competent authority*' di Malaysia sebelum sebarang pergerakan merentas sempadan sisa plastik berlaku.

Malaysia juga akan bekerjasama dengan UK untuk membangunkan garis panduan pengimportan dan pengeksporn sisa plastik di antara Malaysia dan UK. Garis panduan tersebut kemudian boleh digunakan sebagai rujukan kepada negara-negara Eropah yang lain. Adalah diharapkan dengan adanya kerjasama antarabangsa seperti ini akan dapat membantu menyekat dan mengurangkan kes-kes pergerakan dan perdagangan haram buangan yang masuk ke negara ini.

Sekian, terima kasih.